

34-6-F-6 7  
59  
**PROPOSITIONES**

**DOGMATICÆ CRITICÆ CANONICÆ**

*Q U A S*

**PROPUGNANDAS EXPONIT**

**HIERONYMUS FONDA**

**A. S. APOLLONIO**

**Clericorum Regularium Scholarum Piarum**

**IN COLLEGIO NAZARENO SACRÆ THEOLOGICÆ AUDITOR.**



**ROMÆ ANNO MDCCLIV.**

**Ex Typographia Zempeliana prope Montem Jordanum .**

**SUPERIORUM PERMISSU.**

**IMPRIMATUR,**

**Si videbitur Reverendissimo P. Magistro Sacri Palatii Apost.**

***P. M. de Rubéis Patr. Const. Vicegerens.***

---

**IMPRIMATUR.**

**Fr. Vincentius Elena Ordinis Prædic. Rm̃i P. Magistri Sacri  
Palatii Apostolici Socius.**

I.



T sæpe alias & hac potissimum ætate ob scientiarum cultum vere aurea, nos consecutos esse lætamur, quod ad rerum Ecclesiasticarum gloriam quæmaxime pertinebat. Siquidem scientiarum omnium opportuna moderatrix Ars Critica leges singulis institutis accomodatas condens, atque ab aliis latas suffragio suo aut irritas, aut firmas declarans, veri, vel falsi, suspiciosi, vel certi, germani, vel adulterini notas momento cuique tam scite præscripsit, ut difficile dictu sit quanta per eam Ecclesiasticæ Historiæ accesserit majestas.

II. Itaque dicturus ego de Decretalibus Romanorum Pontificum ad Siricium usque, nemo non videt, quam merito hujusce præstantissimæ facultatis regulis potissimum utar, earumque ductu, exceptis epistolis Clementis (a), Cornelii (b), Stephani, Julii (c), Liberii (d), Damasi (e), quæ a primitivæ Ecclesiæ Patribus, aliisque veteribus Ecclesiasticæ Historiæ Scriptoribus referuntur, ceteras commentitias atque apocryphas esse declarem. Quod sane eo alacriore animo efficiam, quo certior ab Eminentissimo Baronio (f) factus sum: *illis non indigere Sanctam Romanam Ecclesiam, ut, si falsitatis arguantur, suis ipsa destituatur juribus, & privilegiis; cum etsi illis careat, ex legitimis tamen, germanisque aliorum Romanorum Pontificum epistolis Decretalibus satis, superque corroborata consistat.*

III. Hinc ut rem intime perspiciamus, illud in primis arbitror animadvertendum, tritum scilicet, vulgatumque inter Criticos axioma esse: *Scripta, quorum nulla mentio in priscis catalogis, nec memorata ab ullo scriptore sequentium proxime sæculorum, aut ficta judicanda, aut saltem suspecta habenda.* Hoc enim tanti roboris semper habitum est, ut Eusebius Pamphili libro 3. Historiæ Ecclesiasticæ cap. 25., plures rejecerit sub Petri, Thomæ, Matthiæ, Andreæ, aliorumque Apostolorum nomine vulgatos libros, hac præsertim de causa, quod *nihil uspiam eorum Ecclesiasticus Scriptor deducta ab Apostolis successione memoravit;* & cap. 3. librum, cui actus Petri nomen erat, & Evangelium, quod sub ejusdem Petri prædicationis nomine circumferebatur, expulserit, quia

A 2

nec

(a) Videatur Sancti Clementis epistola ad Corinth., necnon fragmentum II. epistolæ ad eosdem, quarum meminit Eusebius, alique.

(b) Duæ S. Cornelii epistolæ extant inter opera S. Cypriani, præter eam, cujus meminit S. Hieronymus, & Eusebius lib. 6. Hist. Eccles. cap. 35.

(c) Complures Julii I. epistolæ ad Orientales, ad Clerum, Populumque Alexandrinum referuntur ab Atha-

nasio Apologia II., & a Socrate lib. 2. cap. 18.

(d) Liberii Epistolæ à S. Hilario in fragmentis recensentur.

(e) Una est Damasi, Synodique Romanæ epistola ad Illyrici Episcopos: quam Theodoretus lib. 2. Hist. Ecclesiast. cap. 22. inseruit, aliæque sunt, quæ penes S. Hieronymum inveniuntur.

(f) Baronius ad ann. Christi 865.

*nec vetustiorum quispiam (ut ipse inquit) nec nostra ætatis Ecclesiasticorum Scriptorum desumpto ex iis testimonio usus est. Igitur cum nemo umquam Scriptorum veterum, Anacleti, Evaristi, Alexandri, Sixti, Thelesphori, Higini, Pii, Aniceti, Eleutherii, Viçtoris, Callisti, Urbani, Marcellini, Melchiadis, aliorumque epistolas ne nominaverit quidem, eadem confictæ, aut saltem suspectæ haberi debent; vel, ut cum Augustino loquar, apocryphis jure merito sunt adjungendæ: Libri apocryphi (verba sunt Augustini (a)) Libri apocryphi vocantur, eo quod eorum occulta origo non claruit Patribus, a quibus usque ad nos auctoritas veracium scripturarum certissima, & notissima successione pervenit.*

IV. At dicet fortasse aliquis: *Argumentum*, quod vulgo dicitur *negativum nullius reipsa roboris ab emuncta navis Criticis haberi solet.* Ita sane, si ad id confirmandum firmissima desint, ut inquirunt, positiva. Verum in re, de qua loquimur, tanta rationum congeries mentis oculis una simul occurrit, ut difficile sit exitum, difficilius principium invenire.

V. Ecquid enim nisi suppositionem arguit ejusmodi epistolarum laudari in illis plurimas sacrarum Scripturarum sententias secundum vulgatam, ut ajunt, B. Hieronymi versionem, quæ circa finem quarti sæculi peracta cum sit, a primi, secundi, & tertii sæculi Pontificibus perlegi certe, lustratique non poterat? Inter Criticorum Canones principem fere locum is obtinet, quo edocemur: *Liber, in quo habentur res Scriptore, cujus nomen præfert, recentiores, genuinos inter illius sætus percenseri non potest.* Quare adversus Theodorum Presbyterum memorat in primo codice Photius ab aliis opponi, non esse *verisimile, quæ longo tempore post mortem magni Dionysii evenerunt, ea Dionysium describenda suscepisse.* Hæc Photius; quibus merito addi poterit, quod *falsus temporum ordo non leve fraudis in iisdem proferendis epistolis sit argumentum.* Etenim in Oratione (b) adversus Græcos asseruit, & quidem sapientissime, Tatianus: *Ubi temporum ratio non cobaret, ibi ne Historia quidem vera esse potest.*

VI. *Stili similitudo, idemque scribendi character unitatem Auctoris earundem Epistolarum evidenter demonstrat.* Epistolæ ipsæ conscriptæ barbaro, sordidoque sermone alieno penitus ab elegantia, & nitore sæculi, quo datæ esse finguntur, non aureæ illius ætatis, sed lutei subsequenti ævi Auctorem indicant recentiore. Et sane quomodo fieri poterat, ut tot Epistolæ eundem scribendi characterem, eundemque stilum servassent, si a pluribus, qui diversissimis temporibus Romanam rexisset Ecclesiam, conscriptæ, exaratæque fuissent? Ne in ipsis quidem sacris Scripturis, qui secundum phrasim B. Petri in sua Epist. 2. cap. 1. *Spiritu Sancto inspirati loquuti sunt*, ne in ipsis, inquam, ut advertit Hieronymus Epist. 117., & præfatione in Isaiam idem scribendi stilus deprehenditur. Quomodo quis sibi persuadeat, præfatos Pontifices elegantius non fuisse loquutos, quam infimæ plebis homines, etsi ii, ut plurimum,

(a) Lib. 15. de Civitate Dei  
cap. 23.

(b) Quæ legi poterit tom. 1. Biblioth. Græco-Latinæ Patrum.

5  
 mum, nobilitate insignēs, studiis, doctrinaque non vulgari exculsi, uni-  
 versæ Christi Ecclesiæ præficerentur. *Liber indoctus*, ajunt Critici, *aut*  
*imperitiam redolens, docto viro, quamvis illius nomen præferat,*  
*non est tribuendus; & paulo infra: Si stilus sit diversus a noto aut sa-*  
*culi, aut Scriptoris, sub cujus nomine circumfertur, nec tali sæculo*  
*editum, nec a tali Scriptore exaratum librum ejusmodi judicamus.*  
 Quemadmodum Eusebius lib. 3. Historiæ Ecclesiasticæ cap. 25. ex Apo-  
 stolicorum numero nonnulla explosit volumina, quia ut ibidem asse-  
 rit, eorum dictionis forma ab Apostolica scribendi ratione differre quam  
 maxime videbatur.

VII. Verum ut eo, unde digressus est, redeat sermo meus: Si  
*silentium de re aliqua, quando sermo de eadem occurrat, maximi sem-*  
*per habitum fuit ab Eruditis*, summi reipsa momenti, ad expungendam  
 Epistolarum ejusmodi veritatem erit silentium Hieronymi, qui integrum  
 Ecclesiæ Scriptorum Catalogum nobis, ut ipse asserit, exhibiturus, re-  
 censitos Pontifices Siricii decessores, si tales exarassent Epistolas, nullo  
 pacto omittere debuisset; silentium Leonis IV., dum ad Episcoporum  
 Britannicæ consulta respondens, testatus Apostolicam Sedem in Judiciis  
 Ecclesiasticis sequi Canones, ac decretalium regulas, ubi ea Romano-  
 rum Pontificum decreta percensuit, quæ in Dionysii Exigui collectione  
 inveniuntur, ne verbum quidem fecit de Evaristi, Higini, aliorumque  
 ejusmodi decretalibus; reipsa nunquam id peracturus, si tam eximia  
 Pontificæ potestatis monumenta aliena penitus ab omni fraudis vitio de-  
 texisset. Quod si unum Silvestrum ex Siricii decessoribus nominarit, id  
 factum omnino credimus, vel quia mendum in eam epistolæ partem  
 irrepsit, quemadmodum opinatur Blondellus (a), adeo ut, cum legi-  
 deberet *scilicet*, scriptum sit *Silvestri*, vel, si sentire nolimus cum Petro  
 de Marca, qui id postea adjectum non immerito conjicit, Leo non ad  
 epistolas, sed ad ea, quæ sub Silvestri nomine acta id temporis circum-  
 ferebantur, attendit. Silentium octo primitivæ Ecclesiæ Conciliorum,  
 quæ de rebus eisdem, quæ hisce in decretalibus insertæ sunt, sæpissime  
 actura, easdem, si id temporis viguisset, memorare omnino debuissent.  
 Ecquid enim, juxta commonitorium Vincentii Lirinensis, quid suavius,  
 quid præstantius, quidve ad alia atque alia dogmata statuenda conduci-  
 bilius laudatarum Synodorum Patres asserre potuissent, quam universa-  
 lem, constantem, communemque Romanorum Pontificum per tria prio-  
 ra sæcula auctoritatem? Silentium denique Dionysii Exigui, qui in epi-  
 stola ad Julianum Romanæ Ecclesiæ Presbyterum: *præriteritum*, inquit,  
*Apostolica Sedis Præsulum constituta, qua valui, cura, & diligentia*  
*collegi, & in quendam redigens ordinem titulis distinxî compositis, ita*  
*duntaxat, ut singulorum Pontificum quotquot a me præcepta reperta*  
*sunt sub una numerorum serie terminarem.*

VIII. Neque hujusce ratiocinationis vis ex eo unquam poterit in-  
 firmari, quod Concilium Aquisgranense (b), Colonienſe (c), Mogun-  
 tinum

A. 3

(a) Cap. 16. Prologomen. in Pseudo- (b) Sub Gregorio IV.  
 Isidorum, & Turrianum vapulantes. (c) Cap. 3:

tinum (a), Triburiense (b), Metense (c), Remense (d), Benedictus Levita compiler capitularium Caroli Magni, Hincmarus (e) Laudunensis, Luitprandus (f) Ticinensis, Ordo Romanus, Micrologus (g), Auctor Apologiæ (h) pro Gregorio VII., Anselmus (i) Lucensis Episcopus, Burchardus (k) Wormatiensis, Ivo (l) Carnotensis, Gratianus (m), alique harum Epistolarum testimonia in confirmationem Catholicorum Dogmatum collaudaverint: Omnes enim Conciliorum Patres, atque Ecclesiasticarum rerum Scriptores, qui hactenus adducti sunt, & qui adduci adhuc possent, nono sæculo antiquiores non sunt, nec eas Epistolæ ad severioris Critices regulas revocarunt.

IX. Siquidem Aquisgranense Concilium celebratum est anno salutis 836., Coloniense 887., Moguntinum 888., Triburiense 895., Remense 992., Benedictus Levita floruit circa annum 846. Hincmarus Laudunensis circa 870. Luitprandus circa 950. Ordo Romanus conscriptus est a Bertoldo Constantiensi circa annum 1079., quo etiam tempore Micrologus in lucem editus est, Auctor Apologiæ pro Gregorio VII. scripsit post Synodum Romanam celebratam anno 1074., Burchardus Wormatiensis scripsit anno 1008., Ivo Carnotensis supremum diem obiit anno 1114. Gratianus decretum suum absolvit anno 1151. Ceteri vero omnes Gratiano ipso posteriores fuere. Igitur cum ante annum reparatæ salutis octingentesimum trigessimum nulla decretalium ejusmodi memoria, nulla penitus mentio fuerit apud majores, manet semper in suo robore adducta Critices regula, quod nimirum octo priorum sæculorum silentium invictissimis junctum rationibus, quibus consistat decretales ejusmodi declarantur, posteriorum temporum testimoniis sit jure optimo præferendum.

X. Primum enim Huetianum (n) Axioma est, non quod *genuinus sit liber*, qui talis habitus est ab Auctoribus, qui septem, aut octo post sæcula floruerunt, sed *qui genuinus habitus est ab omnibus proxime, & continuata serie sequentibus cum ætatibus*. Quare Augustinus lib. 33. adversus Faustum cap. 6. cum novi testamenti libros non ex suo, aliorumque sui temporis testimonio, sed ex constanti majorum confessione genuinos esse comprobasset: *Platonis (subdit) Aristotelis, Ciceronis, Varronis, aliorumque ejusmodi Auctorum libros, unde noverant boni.*

(a) Cap. 11.

(b) Cap. 21.

(c) Sub Arnulpho congregatum cap. 5.

(d) Adversus Arnulphum Archiepisc.

(e) In Libello quem Hincmaro Remensi Archiepisc. obtulit, ut hic testatur opusculo 55. cap. 43.

(f) Libro de vitis Pontificum.

(g) Cap. 10. & 41.

(h) Cap. 3.

(i) Lib. 1. adversus Pseudo-Pontificem, & in collectione Canonum, quam adornavit.

(k) In libris, quos edidit decretorum.

(l) In suo decreto.

(m) In suo itidem decreto, quod in scholiis omnibus juris Canonici legitur.

(n) In demonstratione Evangelica parte 1. pag. 12. editionis Neapolitanæ.

dominet, quod ipsorum sint, nisi eadem temporum sibi met succedentium contestatione continua (a)?

XI. Nec mirum, quod citati Concilia, Collectores Canonum, Auctores laudati varia ex ejusmodi Veterum Pontificum Epistolis decreta desumpserint. Etenim illi de earum Auctoribus parum solliciti, nec criticum instituentes examen, dim ipsas, quicunque earum esset Auctor, quoad Dogmatum veritatem, quoad disciplinæ rationem, quoad judiciorum ordinem ab Ecclesia receptas dignoscere, jure quidem, ubi occasio se præbuit, collaudarunt.

XII. Quapropter Eminentissimus Annalium parens tomo x. ad annum Christi 865 excerpta, inquit: ex illis *Capita a Benedicto Levita primam, & postmodum ab aliis collectoribus, ut Canonibus consentientia, probata usu potius recipi ontigerunt, quam constanti illarum firmitate: & aliquibus interjectis: ipse Benedictus Levita etsi ex Isidori collectione accepit multa, tamen bene conscius Auctoritatem illarum Epistolarum haud adeo constarem, sed nutare admodum, nunquam aliquem illarum citavit Auctorem, ut fecit in reliquis, quarum fides constans esset, ut Innocentii, Lewis, Gelasii &c.* Hæc Baronius, quibus merito addi poterit quod Levita ipse ad finem libri 7. Capitularium proficitur, se à Scriniis Moguntinæ Ecclesiæ jussu Autgarii Episcopi tales Epistolas protulisse, quia Auctoritate Sedis Apostolicæ comprobari quam maxime dignoscebat.

XIII. Quæ cum ita sint, Gratiani Auctoritas tanti non est, ut per eam a suscepto differtationis tramite dimoveri possimus. Etenim, ut lib. 4. parte 2. cap. 17. num. 10. de Servorum Dei Beatificatione, & Beatorum Canonizatione scite, ac sapienter advertit SS. D. Noster Benedictus XIV. (b), de cujus summæ eruditionis, sapientiæque laudibus nulla unquam posteritas conticescet, major fides præstanda est doctissimo ejus emendatori Antonio Augustino Episcopo Tarraconensi, quam

A 4

Gra-

(a) Hæc Augustinus; Quæ quidem tanti roboris haberi debent, ut, deficientibus tabulis, hoc duntaxat, & non alio argumento probari soleant avita bona hæreditario jure ad aliquem pertinere.

(b) Scribit enim in loco citato circa medium: *Tractum temporis animadversum fuit opus Gratiani mendis scatere: atque adeo Antonius Demochates, & Antonius Contius ejus emendationem aggressi sunt. Celebrissimus subinde Antonius Augustinus suos edidit libros de emendatione Gratiani, de qua re etiam scribere incæperat Didacus Corruvias, qui post animadversos, & restitutos*

*fereterecentum locos, supersedendum duxi, ut audivit Antonium Augustinum Romæ eidem negotio operam impendisse, & prope ad umbilicum pervenisse, sicut refert idem Didacus lib. 4. variarum Resolutionum capi 11. His itaque excitati Romani Pontifices necessarium esse putarunt munum adnovere correctioni operis Gratiani, doctisque viris, qui tanta in re laborarent, opus, quod ceptum erat sub Pio IV., & progressum habuerat sub Pio V., absolutum tandem fuit, & typis editum sub Gregorio XIII. Huc usque Pontifex eruditissimus.*

Gratiano ipsi, quemadmodum liquido patet cuicumque, qui citati Præfulis legat librum, cui titulus: *Gratianus emendatus*. Porro hoc in opere citatus Episcopus acute, probeque animadvertit multas in Epistolis, de quibus loquimur, ex Codice Theodosiano, ex posteriorum Pontificum, ac Conciliorum Decretis, multas ex Scholiis, quæ sub Aniani nomine perleguntur, atque in Theodosiano Codice extant, insertas sententias fuisse. Quo certe luculentius excogitari non poterit argumentum, ut confictæ tales Epistolæ declarentur.

XIV. At vero ne sit qui judicet cognationem, quæ inter veterum Pontificum decretales, & Theodosianum Codicem, nonnullasque posteriorum Pontificum, ac Conciliorum Epistolas invenitur, non ex eo ortam esse, quod qui tales confixit Epistolas ex Theodosiano Codice, ex subsequentium Pontificum, ac Conciliorum Decretis eas decerpserit, sed quod subsequentes Pontifices, Concilia & Patres plurima ex iis hauserint, suasque in sententias asportant; Ne, inquam, qui id falso cogitet, inveniatur, animadvertendum in primis est, Patres, Concilia, & Pontifices, in quorum operibus iusmodi decretalium sententiæprehenduntur, ubi Auctoris cujusvis alterius decreti, quod citant, & ejus, cui inscriptum fuerat, memiserunt, nunquam Higinii, aut veteris alterius Pontificis nomina protulisse. Quod saltem honoris causa, & studio ostendendi antiquitatem illius; iusdem doctrinæ, quam inculcabant, credi certe non poterit omittere debuisse. Secundo, quæ communes reperiuntur sententiæ non cum sibi Scriptorum illius ætatis, qua datæ effinguntur epistolæ, sed cum stilo, quo integra subsequentium Conciliorum acta, vel Pontificum Decreta exarata sunt, adamussim convenire observantur. Igitur si certus, uti certissimus ille Critices Canon est: *Sententiæ non illi, cujus sub nomine circumferantur, sed ei, cujus stilum præferant, sunt adscribendæ*: Si verus, inquam, hic Critices Canon sit, non ex veteribus Posteriores sententias exciperunt, sed posteriores veteribus perperam affinxerunt.

XV. Quod & earundem Epistolarum argumenta demonstrant. Nullo enim pacto convenire a videntur cum primis iis Ecclesiæ sæculis, quibus Pontifices illi Siriani Deceffores mortalium in numero versabantur; Nullum ibi verbum de primorum sæculorum Hæreticis, nullum de persecutionibus adversus Christi Ecclesiam diverso tempore excitatis, nullum de Confessorum glamine, nullum de exhortatione ad Martyrium, nullum de lapsis, aliisque id generis, quæ primis iis Ecclesiæ sæculis occurrebant, & quæ in cœvis aliis quorundam Romanorum Pontificum, ac Sanctorum Patrum scriptis, quæ devicta temporis injuria, supersunt, sæpissimè recensentur.

XVI. Non ergo summis primitivæ Ecclesiæ Pastoribus juxta regulas Critices ullo pacto poterunt adjudicari. Præsertim quia ipse SS. D. Noster Benedictus XIV., qui quantum dignitate reliquis hominibus præstat, tantum eruditionis, ac scientiæ laude eximiis nostræ ætatis scriptoribus præesse visus est, in nunquam satis superque laudato Opere de Servorum Dei Beatificatione lib. 1. cap. 3. §. 3. cum de colligendis Actis Marty-



9

Martyrum sermonem instituat, licet primam hac de re Fabiani Pontificis decretalem adduci posse commemoret, ea nihilominus, commentitia utpote, minime contentus, sinceriora ex S. Cypriano in medium judicat proferenda.

XVII. Verum cum tanta mihi dicendi copia non suppetat, ut hæc omnia recensere pro dignitate possim, de eo tandem, qui talium Epistolarum collectionem peregit, sermonem instituam: Atque in primis præmittam, S. Isidorum Hispalensem, cui prudentia, consilioque neminem anteponas, paucos jure conferas, hujus collectionis Auctorem falso ab aliquibus reputari. Obiit enim eximius hic Sanctitate Vir, vel anno peractæ Redemptionis 647., ut Velæus in Chronico autumat, vel 643., ut Rodericus Toletanus lib. 2. Historiarum cap. 18., vel 635., ut Officium proprium Sanctorum Hispaniæ, vel certe anno reparatæ salutis 636. Cinthila Regnum ineunte, Heraclii Augusti anno 26., ut testatur Redemptus illius Diaconus in Historia ipsius vitæ, Braulio Cæsaraugustanus in Catalogo operum Isidori, Lucas Tudenis lib. 3., Mariana lib. 6. cap. 7., Baronius ad hunc annum, Grialus adnotationibus in Redempti narrationem, ac tandem liquet ex sexti Toletani Concilii subscriptionibus; Namque hoc congregatum cum fuerit anno 638., eique subscriptus perit Honoratus Hispalensis Episcopus, qui Isidoro, post amicum Theodiscum, successerat, liquido constat duobus saltem, tribusve annis ante, Isidorum ipsum è mortalium numero decessisse.

XVIII. Itaque qui tales Epistolas collegit primus, vel potius construxit, quicumque ipse sit, ab Isidoro Hispalensis Ecclesiæ Episcopo longe alius fuerit necesse erit. Meminit enim Concilii Toletani undecimi, quod celebratum est anno 675. ab Isidori obitu 39., meminit Concilii Generalis vi., quod Constantinopoli habitum est anno 681., quadraginta quinque annis post obitum Isidori, meminit Gregorii II., & III., nec non Zachariæ Summorum Pontificum, qui post annum septingentesimum floruerunt: Quinimmo cum plurima, quæ in quinto Etymologiarum libro à B. Isidoro, seu post ejus mortem à Braulione Cæsaraugustano Episcopo fuerant exarata, in hujusce collectionis Præfatione, deprehendantur, Decretalium collectionis Auctorem ab ipso Isidoro diversum quam maxime patefaciunt. Nullus quidem magni nominis Scriptor, nulla cogente necessitate, recoctam crambem Lectoribus solet apponere, aut ex opere, quod ignorat, sententias in rem suam potest transferre.

XIX. Quæ omnia si parvi ab aliquo ducerentur, utpote quæ post Isidori mortem potuissent illius collectioni ab alio adjungi, is certe ab hac opinione recederet, si cogitaret, nullam collectionis ejusmodi mentionem fieri in scriptis Braulionis, & Ildefonsi, qui cum Hispalense vixerunt, omniumque illius librorum Catalogum se reliquisse posteris testati sunt.

XX. Cum igitur Isidorus Hispalensis non fuerit, quem umquam talium Epistolarum collectorem, vel potius Auctorem esse dicemus? Occurrit initio noni sæculi Eulogii Cordubensis Frater, Isidorus nomine, Hispanus genere, conditione Mercator. Porro cum Bæici, Carthagi-

nenfes, Lusitani sub Maurorum Tyrannide miserimam vitam ducerent, cum Gallæci, Astures, Cantabri, Tarraconenses Gallorum auxiliis vix sustentati quotidie pro vita, pro fide, pro libertate pugnarent, Alvarus, Isidorus, & Eulogius Fratres, sive ob suspicionem infæ cum Francis Ducibus conjurationis, sive ob alias quasunque causas, Sacracenis invisī, ita sibi fuga consuluerunt, ut ubi Eulogius, quemadmodum ipse testatur in Epistola (a) ad Willelindum, Pompelone subsistere coactus sit, Alvarus, & Isidorus, perrupto obice, inter Germano-Francos per fugium quæsierint, ac Moguntia per annos aliquot negotiatorum contubernio usi, sublevandæ fortassis inopiæ causa, mercaturam aliquam exercuerint. Itaque cum id temporis, quo Moguntia hi moram ducerent, Moguntini, uti liquet ex Præfatione Benedicti Levitæ, eo majore animorum contentione ad Apostolicam Sedem appellationes instituendas defenderent, quo majore eas alii conatu oppugnare nitebantur, facile credi poterit unum ex hisce Eulogii Fratribus, Isidorum nempe, quo vires eis, qui pro veritate pugnabant, adjungeret, hæc sub nomine antiquorum Pontificum Epistolas suo ipsum Marte confecisse.

XXI. Ecquid enim harum Epistolarum serie ad litem hanc dirimendam conducibilius, & quis ad comparandam eisdem fidem Hispano Mercatore opportunior potuisset promulgator excogitari? Credidissent namque populi (ut re ipsa crediderunt) collectionem hanc de Hispaniis ab Hispano mercatore quidem, sed pietatis causa profugo, pretiosum veluti thesaurum barbaricæ Maurorum libidini subductam esse, eamque, ut Germano-Francis amicissimis Fidei potius concreditam, quam furentium prædonum periculis objectam, summo in honore, maximaque in veneratione habuissent. Quare Christianus Lupus (b) rite judicavit Decretales ejusmodi viri Hispani opus esse: *constatum* (ut inquit) *ad suis contribulibus retinendam, aut reficendam, quam Barbarica calamitas dermire coegerat, antiquorum Canonum memoriam; præsertim circa Romanas appellationes, aliaque Capita Romani Primatus. Etenim uti Vigilius Tapsensis Episcopus varia sub Sancti Athanasii, ac etiam sub Idacii Clari nomine scripsit contra Arianos, ita hic Auctor contra veros, aut fælos amulos Romana Cathedræ. Est vetusta hæc, quandoque in bonum, quandoque in malum industria; Nam & in libro de Pelagii apud Diospolitanam Synodum gestis scribit Sanctus Augustinus: mihi quidem fratres nostri nonnulla opuscula meo sub nomine in Hispaniam venisse dixerunt, quæ licet ab eis, qui alia nostra legissent, non agnoscerentur, ab aliis tamen nostra esse credebantur: Ista industria plures nobis apocryphas peperit scripturas: Non ergo Isidorus Hispanensis sæculo sexto & sub initio septimi (ut superius demonstratum est), sed alius tali nomine sæculo octavo Isidorianæ collectionis habendus est Auctor;*

(a) Legi hæc poterit part. 1. t. 9. Biblioth. Patrum.

(b) Videatur opus, cui Titulus: *Divinum, ac immobile Sancti Petri circa omnium Fidelium ad Romanam*

*ejus Cathedram appellationes assertum privilegium, idque præsertim in differtat. 1. cap. 35. pag. 361. editionis Moguntinæ ann. 1681.*

etor : ( licet Iſidori nomine deceptus Remenſis Hincmarus , eum Hiſpa-  
lenſem crediderit , cæteriſque occaſionem præbuerit , ut ipſi quoque ſe-  
cum una deciperentur ) . .

XXII. Hinc ſi alicui in votis ſit ſcire , cur hic Epiſtolarum Auctor ,  
non Mercatoris tantum , ſed Peccatoris adhuc nomine inſignitus quibuſ-  
dam in codicibus inveniatur , facile id perſpiciet , ſi memoriam illius  
temporis repetere velit : ſis porro Eccleſiæ ſæculis Epiſcopos , dum  
Conciliorum Decreta ſua ſubſcriptione firmarent , Peccatoris nomine  
maxime gaviſos eſſe invenimus , quemadmodum in Concilio Turonenſi  
I. & II. , Pariſienſi III. , Matifconenſi I. , aliſque , quæ brevitatis gra-  
tia omittuntur ; Peccatoris quoque titulo uſum eſſe legimus Eulogium  
ejuſdem Iſidori fratrem Memorialis lib. I. , & Apologetico Sanctorum ,  
ubi inquit : *Ego interim Peccator Eulogius* ; Ac denique tum ad finem  
ipſius Apologetici , tum in documento Martyrii , tum ad finem Epiſto-  
læ ad Willeſindum repetit : *Ego ille Peccator* . Cum ergo mos hic tam  
laudabilis apud viros numeris omnibus abſolutos id temporis invaluiſſet ,  
nil mirum , ſi huius collectionis Auctor ſe ipſum quoque ſub Peccatoris  
nomine publicarit . Mercatori igitur Iſidoro , ſive Peccatori , non vero  
Hiſpalenſi harum Epiſtolarum congeries eſt tribuenda , quemadmodum  
ſenſit Eſmus Baronius ad annum Chriſti 102. num. XI. inquit : *Iſido-  
rus non ille Sanctus Epiſcopus Hiſpalenſis , ut multi nomine decepti  
ſunt opinati , ſed ille dictus cognomento Mercator , ut ſuo loco dicemus ,  
collectionis Auctor eſt* . Atque ut omittam Antonium Auguſtinum (a)  
ex Epiſcopo Ilerdenſi factum Archiepiſcopum Tarraconenſem , Anto-  
nium (b) Contium Juriconſultum præclariffimum , Natalem (c) Ale-  
xandrum , Petrum (d) de Marca , Cardinalem (e) Cuſanum , aliolque plu-  
rimos , ſenſit & Eſmus Bona , dum libro primo Rerum Liturgicarum :  
*Dudum , inquit , ab eruditis obſervatum eſt , Romanorum Pontificum  
Epiſtolas Decretales uſque ad Siricium ſuppoſuiſſas a quodam Hiſpano  
ſub nomine Iſidori ſub finem ſeptimi ſæculi pia fraude conſectas , & ſen-  
tentiis veterum Canonum , Legum etiam Civilium , & Sanctorum Pa-  
trum , qui quarto , & quinto ſæculo floruerunt , turpi anacroniſmo ,  
eodemque fere ſtilo , & dicendi charactere magna ex parte contextas eſſe* .  
Huc uſque Cardinalis ampliſſimus . Quare non ineleganter de Blondel-  
lo , qui in Pſeudo-Iſidoro ſuo plurima fraudis vitia in ſingulis ejulmodi  
Epiſtolis detegere conatus eſt , fertur jocose dictum a Patre Sirmondo ,  
*eum totis viribus , atque immenſo conatu , januam per ſe jam pate-  
tem effringere ſuſcepſiſſe* .

XXIII. Quæ cum ita ſe res habeat , nemo eſt , qui non videat ,

A 6

quo-

(a) In ſuo Gratiano emendato ,  
& ad Hadriani I. Capitulorum colle-  
ctionem , præſertim 36.

(b) In Præſatione , quam notis  
ſuis in Corpus Juris Canonici præſi-  
gendam compoſuit , atque in anno-  
tat. Canon. 70. diſtinct. 16.

(c) In Hiſtor. Eccleſ. Sæculi I.  
Diſſert. XXI. Schol. 2.

(d) De concordia Sacerdotii , &  
Impetii lib. 3. cap. 5.

(e) Lib. 2. de concord. Cathol.  
& 37. , & lib. 3. cap. 2.

quomodo intelligenda sint verba illa (a) Gelasii, quibus statuitur: *Decretales Epistolas, quas Beatissimi Papæ pro diversorum temporum consultatione dederunt, venetabiliter recipiendas*. Enimvero cum Gelasii sententia nihil peculiare habeat, nihilque definitum, ejus constabit veritas, etsi non ad Decretales Cleti, Higini, aliorumque, de quibus loquimur, referatur, sed eas duntaxat respiciat, quas Clemens, Cornelius, Stephanus I., Julius, Liberius, Damasus, Siricius, Innocentius, Zosimus, Bonifacius, Cælestinus, Sixtus III., S. Leo, Hilarius, Simplicius, & Felix III. Decessores Gelasii exararunt. Hi namque diversis temporibus ab Urbe Roma pro diversorum Patrum consultatione Decretales Epistolas ediderunt.

XXIV. Quod si S. Nicolai Magni Epistola ad universos Gallicanæ Ecclesiæ Episcopos ab aliquo nobis objiciatur, ex ea quidem nullo pacto, qui Auctores Epistolarum ejusmodi fuerint, patefiet (cum de hoc (b) nulla Nicolaum inter, & Gallicanos Antistites oborta fuerit controversia), sed earum duntaxat auctoritas innotescet, earum scilicet, quas Ecclesia usu suo receperat, & Apostolica Sedes suo oraculo firmas reddiderat. Venerabiliter porro recipienda est Dogmatum veritas, Disciplina ratio, Judiciorum ordo, qui hisce in Decretalibus invenitur: Desumptus quippe est, ut uberius, quam par erat, ostendimus, ex posteriorum Pontificum, Patrum, & Conciliorum Decretis, quæ quantam a nobis venerationem exigant nemo est, qui non videat, dignoscatque.

XXV. Quæ omnia tamen notissima sint, & a Catholicorum nemine in dubium vocata, ea tamen oportuit paullo distinctius enarrari, & in memoriam reduci, ut quisque apertius vim intelligeret argumenti, quo meum innititur propositum, scilicet S. Nicolaum Magnum, non quis esset auctor, sed quanta Decretalibus hisce inesset auctoritas, adversus refragantes Gallos solummodo propugnasse. Etenim dum ex sententia S. Leonis (c) Magni omnia Decretalia omnium Decessorum suorum ibidem observanda proponit, profecto non omnium omnino Decretalium, quæ in præsentiarum habentur, designat antiquitatem, sed quoad hanc ea solummodo ex Isidoriana Collectione respicit, quæ revera genuina sunt, eosque appellat Pontifices, qui reipsa epistolas conscripserunt. Probe ut ergo adversarii (quod nunquam certe probare poterunt) probent

(a) Vid. Acta Synodi Rom. sub Gelasio habitæ anno 494.

(b) Quapropter Baronius ad annum Christi 865. §. 5. Verum, inquit, verum his temporibus, cum perisse in omnibus cognita essent, nondum admota lucerna Cleanthis, ea ex parte tantum Galli eas recipiendas negarent, quod extra corpus Canonum suo seorsum volumine posita haberentur, hanc objectionem eorum

magni esse posse momenti Nicolaus considerans, dum reliquæ omnes Romanorum Pontificum extrapositæ Decretales abolerentur una ista sententia, rescripsit ad eos epistolam Decretalem magni ponderis.

(c) Vid. hujus Summi Pontificis epist. data ad universos Episcopos per Campaniam, & Picenum, vel Tusciam, & per universas Provincias constitutos.

bent juxta régulas Critices ex testimonio Scriptorum cœvorum, vel proxime sequentium a Lino, Cleto, Evaristo, aliisque epistolâ reipsâ conscriptas, illasque eas omnino esse, quæ ab Isidoro Mercatore, seu Peccatore in collectione sua proponuntur, atque ita jure colligent de iis B. Leonem loquutum esse, easque, ex ejusdem S. Leonis sententia, B. Nicolaum in epistola, quæ nobis objicitur, respexisse.

XXVI. Hinc summo vitio, & crimini post Centuriatores (a) dandum est Blondello Calviniani gregis homini, quod citato in libro, qui inscribitur, *Pseudo-Isidorus, & Turrianus vapalantes* dementissima, inconsideratissimaque temeritate suppositas hasce Epistolas conviciis, & maledictis proscindere non vereatur. Honoris enim observantia, & non præfracta despectio iis exhibenda est veritatibus, quas tam docte, quam pie assertas, propugnatasque in ejusmodi Epistolis invenimus: Præsertim cum ipse Blondelli conatus, etsi sui odii virus longe lateque diffundat, tueatur potius, quam oppugnet Apostolicæ Sedis auctoritatem. Abjudicat enim plurimas harum Epistolarum sententias a Cleto, Evaristo, Higino, aliisque Petri Cathedræ Pontificibus, eo potissimum argumento, quod Conciliis, Patribus, aliisque optimæ notæ Scriptoribus, qui uno ferme, aut altero post eos sæculo floruerunt, uni ce sint adscribendæ (b). Igitur contra finem, quem sibi posuit in mente, talia ex quarto, quinto, ac sexto Ecclesiæ sæculo Pontificiæ Auctoritatis monumenta produxit, ut quæ summo labore evertenda suscepit, luculentissime suo in opere confirmarit.

XXVII. Nihil ergo jam superest, nisi ut Decretales Pontificum ad Siricium usque, exceptis iis, quæ a primitivæ Ecclesiæ Scriptoribus recensentur, commentitias jure merito statuamus; Isidorum Mercatorem, seu Peccatorem earundem Epistolarum Auctorem esse dicamus; Ac tandem Leonis, Gelasii, Nicolai Magni, aliorumque Summorum Pontificum Decreta, vel de istis minime intelligenda, vel si de his intelligi velimus, non ad Auctorem, sed ad Dogmatum veritatem unice referenda esse pro certo habeamus.

### De Præadamitis.

I. **Q**ualis Hieronymo visus est Jovinianus lib. 1. adversus eundem; scilicet *vel per febrem somniare, vel abreptus morbo phrenetico Hippocratis vinculis alligandus*: Talis viris probis apparuit Isaacus Peyreriis impiæ, ac stultæ Præadamitarum hæresis inventor, cum auctoritatem sacrarum Scripturarum, quam sibi objicere debuisset, nescio qua confidentia, adsciverit in patrocinium causæ suæ. Aiebat enim: Pentateuchi auctor, Judæus utpote, cujus institutum erat scribere initium, leges, propaginem Gentis suæ, exposita Geneseos 1. creatione aliarum Gentium, in 2. ejusdem Geneseos cap. novam proposuit creatio-

nem

(a) Centuria 2. cap. 7.

*Pseudo-Isidorus Prolegomenon* cap.

(b) Citato in libro; cui titulus 12. & 13.

14  
nem Adami primi hominis judæi, a quo Gens illa peculiaris, & electa suam traxit originem.

II. En virum severioris Critices canones plenis buccis crepantem ! Quid enim ? nunquid non in 2. eodem Geneseos capite, ut versu 7. hominis, ita versu 4., & 5. creationis cæli, terræ, plantarumque a Moyse repetitur enarratio ? Igitur si, Peyrerio iudice, versu 4., & 5. secundi capitis non aliæ cæli, non alia terra, non plantæ aliæ proponuntur creatæ, quam quæ primo capite sunt propositæ, nec pariter versu 7. secundi ejusdem capitis alia hominis describitur creatio, quam quæ primo capite memoratur.

III. Rîsum vero excitat, quod stultam hanc in sententiam ipse devenerit, propterea quod intelligere non poterat, quomodo ea multa, quæ peracta dicuntur a primo creato homine ad Evam usque ex Adami latere educam, dimidio unius diei peragi potuerint. Quam leve enim, ineptumque argumenti genus hoc sit, dignoscet facile qui animadvertat, infinitam Dei virtutem, & potentiam esse, de cujus operibus scite Augustinus scripsit ad Volusianum epist. 3., nunc 137. cap. 8. *Hic si ratio queritur, non erit mirabile, si exemplum poscitur, non erit singulare: Demus, Deum aliquid posse, quod nos fateamur investigare non posse. In talibus rebus tota ratio facti est potentia facientis.*

IV. Accedit, quod eodem 2. in capite, enarrata creatione cæli, & terræ, additur: *& homo non erat, qui operaretur terram.* Hoc enim verum non foret, si, juxta Præadamitarum somnia, ante Adamum fuissent Gentes illæ, quarum Parens in primo capite designatur. Non diversa igitur, sed eadem, quæ in primo Geneseos capite brevis proposita fuerat Moyses, prolixius, & accuratius in secundo capite explicavit. Atque ideo dicendum cum Apostolo Actor. 17. v. 26, quod *fecit Deus ex uno*, scilicet ex Adamo, *omne genus hominum inhabitare super universam faciem terræ.*

V. Plurima alia Peyrerius contorta, & aculeata ingerit sophismata ex versu 12. 13., & 14. capitis quinti epist. ad Rom., ex Sinarum, Chaldæorum, Ægyptiorumque fabulis, ac commentitiis eorum origine, quæ hic percerere nec juvat, nec decet. Talia enim sunt, ut apposite in hunc delirum hominem scribenda videantur quæ Augustinus scripserat contra Cresconium lib. 2. cap. 12. nûm. 15.; videlicet, *quomodo sperem, te auditurum esse quod dico, qui tam in proximo non audis ipse quod dicis, cum tibi continuo contradicis ?*

VI. Hanc denique ad redarguendam pervicaciam erudite congesta scire cupientem docebunt Ursinus Danhauverius, Eusebius Romanus, Meretzius Groeningensis Theologus in opere, cui titulus *Refutatio fabula Præadamitiæ absoluta septem primariis questionibus, cum præfatione apologetica*, docebunt Moriaus, Antonius Hulsius in libro inscripto *non ens præadamiticum*, Joannes Pithius, Joannes Hilpertius in *disquisitione de Præadamitis*, alique. Ille enim exposita in deliramenta vix abiit, cum Catholici complures in eum illico insurrexerunt adeo, ut, Hermantio teste in hæreticum hist. italice traducta, & Veneris edita

anno

anno 1735. pag. 352., ultimum ignis supplicium proculdubio expertus esset, nisi ad pedes Alexandri VII. cum confugisset, tum voce, tum scriptis vesanam hanc heresim ejurasset.

VII. Nullum ergo necdum firmum, ac validum, sed ne mediocre quidem a Prædamitis produci poterit argumentum, quo eorum systema minus veritati contrarium deprehendatur.

### *De vera Scripturarum interpretatione.*

I. **D**iximus de Prædamitis, nunc autem de aliis ex eodem grege pauca dicenda sunt. Duplicem hi in Scripturis perspicuitatem agnoscunt, externam unam, quæ ex illius propositione ortum habet, interiorem alteram, quæ ex penetratis ejusdem Scripturæ oraculis statim exurgit. Primam ex se ipsa prodire, secundam vero (non ægre uras verbis, quibus, sin minus latine, certe magis dilucide explicatur res) secundam, dico, per Œstrum, sive inspirationem, quam sibi novitatis amatores a Domino promissam somniant, distitant liquido aperiri. Itaque de hoc una mente, unaque voce consentimus cum ipsis, quod sacræ Litteræ firma Fidei norma sint judicandæ; Dissidemus autem in eo, quod, ubi ipsi normam, & Judicem inscite, imprudenterque confundunt, nos unam ab altero distinguimus adeo, ut, contententibus illis Scripturam, judicem, & normam quid unum esse, confirmemus nos & Scripturam credendi, operandique esse regulam, & Judicem ad eam certo, & infallibiliter interpretandam necessario admitti oportere, eumque vel Pontificem Maximum esse, qui ex cathedra, ut inquitur, loquatur, vel Synodum Œcumenicam, quæ verum sacrarum Litterarum sensum, quin ullus relinquatur dubitationi locus, palam omnibus manifestet.

II. Hæc est doctrina, cum qua nata est, & crevit Ecclesia; Hanc præstantes sapientia, & sanctitate Viri perpetuo scriptis commendarunt suis; Ab hac qui recedunt, ii a catholicæ veritatis laude absunt quam longissime. Quod enim opponi solet ab iis, nequit re ipsa consistere, nisi perturbentur Scripturæ. Porro *revela oculos meos, & considerabo mirabilia de lege tua cecinit* Psalmista psal. 118. v. 18., & v. 34. *da mihi intellectum, & scrutabor legem tuam*. Discipulis adeuntibus Emmaus, ut accepimus a B. Luca cap. 24. v. 27. *Jesus apparuit, & incipiens a Moyse, & omnibus Prophetis interpretabatur illis in omnibus Scripturis, quæ de ipso erant*. Eunuchus Candacis Reginae Æthiopum, cum Isaiam legeret, ac interrogaretur a Philippo, num lecta intelligeret, respondit Actorum 8. v. 31. *& quomodo possum intelligere, si non aliquis ostenderit mihi?*

III. Scriptum igitur Dei verbum, ipsa Scriptura teste, perspicuum nobis non sit, nisi explicetur ab his, quibus a Domino dictum est, Matthæi 5. v. 14., *vos estis lux mundi* qui ad Eph. 4. v. 11. *Pastores* proclamantur a Paulo, & *Doctores*, quorum ex ore legem requirere a Malachia cap. 2. v. 7. jubemur. Tanti enim hos interest, ut ad Deum conversus scripserit Vates regius citato psal. 118. v. 130. *declaratio ser-*

*monum tuorum illuminat, & intellectum dat parvulis*, iis scilicet, qui, quemadmodum hominem vere christianum decet, magisterio subijciuntur Ecclesiae, ut doceantur. Siquidem, quae latent in Scripturis, mysteria absconduntur his, qui de mundi sapientia, & prudentia prae caeteris gloriantur, patent vero iis, qui veritatis lac ex uberibus Ecclesiae dum hauriunt, felices parvuli Matth. 11. v. 25. a Christo Domino dicti sunt.

IV. Quid ad hæc Hæretici, quos diris malis devotos, & anathemate a Paulo percussos paternæ, & avitæ demonum fraudis æmulatores Nicæni Patres dixere? Reponent fortasse, Davidem, qui luculentissima nobis suppeditat argumenta, hebraicam linguam non egregie calluisse, superbia tumidum fide omni destitutum esse, aliaque id genus effugia, quæ suis ut gregalibus fucum facerent, excogitarunt? Nullo pacto. Hæc enim si dicerent, prodigio similem suam nobis impudentiam aperirent, nullumque proferrent verbum, quo non suo veluti gladio jugulari possent.

V. Dicent ergo, post promulgatum solummodo Evangelium, & Spiritus Sancti adventum Scripturarum perspicuitatem exortam esse. At post promulgatum Evangelium Apostolorum Princeps *epist. 2. cap. 3. v. 16.* de epistolis B. Pauli memorie prodidit, *quodam* in ipsis esse *difficilia intellectu, quæ indocti, & instabiles depravant, sicut & cæteras Scripturas, ad suam ipsorum perditionem*: Actorum quoque 15., post adventum Spiritus Sancti, cum *quidam descendentes de Judæa* docerent *Fratres, quia, nisi circumciderentur secundum morem Moysi, non possent salvari*: Fideles non ad Scripturarum oracula, ut ipsa confulenter, sed *ad Apostolos in Jerusalem*, ut verum eorum sensum sibi ultimo definirent, *super hac questione* ascenderunt. Quare Apostoli ipsi cum suo Principe Petro, quo se solos, suosque in Episcopatu successores controversiarum ejusmodi institutos a Deo judices patefacerent, *visum est, dicere, visum est Spiritui Sancto, & nobis: Spiritui Sancto*, nimirum, qui in Scripturis, & Traditionibus id revelavit, *nobis*, qui facultate, quam ab eodem divino Spiritu accepimus, ex Scripturis, & Traditionibus certo, & infallibiliter hoc definiimus.

VI. Cæterum si ecclesiasticæ historiæ rationem hæretici haberent, & primitivæ Ecclesiae temporum, quæ laudibus alioquin esserent, conditionem perspicerent, talia utique non blaterarent. Si verum namque, quod dictitant, cur ab ipso Ecclesiae exordio, disceptationibus in causa Fidei obortis, Fideles Scripturam non quidem, sed Ecclesiam, ut certo Scripturam exponeret, appellarunt? Cur, juxta Chronicon Brietianum, anno 252. in causa Novatiani Clinici, anno 265. in causa Pauli Samosateni, anno 325. in Arii causa, ut cætera missa faciam, cur, inquam, non ad Scripturam, sed ad Concilium, modo Romanum, modo Antiochenum, modo Nicænum, ut sibi explicarentur Scripturæ, Fideles communiter cucurrerunt? Nulla quippe Fidei causa, nulla disceptatio per solam Scripturam, absque examine, & judicio Ecclesiae, finem unquam sortita est. Ipsa etiam in Synagoga cum excitaretur dissidia, non ad solos Scripturarum codices, sed *ad Sacerdotes Levitici generis* ex præcepto



cepto Domini *Deuteronomii* 17. a partibus dissidentibus confugiendum erat: nec de legalibus tantum, ut adversarii explicant, sed *de lege, de mandato, de justificationibus*, ut ex 2. Paralipomen. cap. 19. v. 10. innotescit.

VII. *Omnis prophetia Scriptura propria interpretatione non fit* docuit B. Petrus epist. 2. cap. 1. v. 20. , nimirum, teste Basilio Magno in epist. ad Neocæsarienses, verus Scripturæ sensus privato hominis ingenio definiri non potest, sed, sicuti affante divino Spiritu editus est, ita per ejusdem divini Spiritus promissum Ecclesiæ lumen unice est penetrandus. *Non enim* (Apostolorum Princeps ibidem subjungit) *non enim voluntate humana allata est aliquando Prophetia, sed Spiritu Sancto inspirati* (seu, ut græce legitur, *Spiritu Sancto acti, & impulsu*) *loquuti sunt Sancti homines Dei.*

VIII. Jure ergo non aliunde hæreses nasci docuit August. tract. 10. in Joannem, *nisi dum Scriptura bene intelliguntur non bene, & quod in eis non bene intelligitur, etiam temere, & audacter asseritur.* Siquidem, ut idem S. Doctor scribit in epist. ad Volusianum num. 3. , tanta in Scripturis Sanctis latet altitudo sapientiæ, ut *annosissimis, acutissimis, flagrantissimisque cupiditate discendi id contingat, quod eadem Scriptura quodam loco habet: cum consummaverit homo, tunc incipit.* Quare scribebat Vincentius Lirinensis in commonit. 1. cap. 38. *Quid facient catholici homines, & Matris Ecclesiæ Filii? quoniam modo in Scripturis sanctis veritatem a falsitate discernent? Hoc scilicet facere magnopere curabunt... , ut divinum canonem secundum universis Ecclesiæ traditiones, & juxta catholici dogmatis regulas interpretentur: ut postmodum sess. 4. definivit Synodus Tridentina.*

IX. Et quidem merito. Quid enim ex Scripturis clarius, quid luculentius proferri potest his Matthæi verbis cap. 26. v. 27. *Hoc est Corpus meum?* & tamen obscura hæc adeo Zuinglianis videntur, Carolostadianis, Calvinistis, Lutheranisque, ut ubi illi (Sacramentarios dico) nihil in Eucharistia, præter signum vacuum, meramque Christi Corporis figuram, temere agnoscunt, isti (Lutherani scilicet) veram Christi carnem, & sanguinem cum panis, vinique substantia hoc in Sacramento una pariter consistere fabulentur.

X. Audacissimus ergo ex omnibus, qui de vero Scripturarum sensu ultimum sibi, incorruptum, gravissimumque judicium adscribat, denegat vero Pontifici, pro cujus fide rogavit Christus, denegat generalibus Synodis, in quarum medio Christus se perpetuo futurum esse promisit.

XI. Ad dirimendas duos inter homines de testamento aliquo obortas lites non sola sufficit testamenti productio, ut Augustinus adnotat in p<sup>o</sup> alium 21. num. 30. , sed auctoritas exigitur judicis, qui, potestate a Principe sibi facta, illud ad unum potius, quam ad alterum judicet pertinere: & sufficiet forte, cum de Scripturarum intelligentia oboriantur controversiæ, sufficiet, inquam, sola Scripturarum productio, quin auctoritas quærat Ecclesiæ, quæ judex in controversiis hujusmodi a Domino constituta quid ea de re sentiendum, quidve credendum sit, judicii firmitate declaret? *Æternæ procul dubio lites futuræ essent, si talibus*

bus in controversiis Ecclesia a Deo iudex constituta audienda non esset, idque providentiæ, qua regimur, adversaturum quammaxime, quem latere possit, arbitror esse neminem.

XII. Non sufficit ergo omnibus dogmatibus definiendis scriptum Dei verbum, quod non omnibus apertum, neque perspicuum est.

## *De Diaconissis.*

I. **E**Thi soror Moysis exodi 15., Debbora Judicum 4., Holda 4. Regum 22. & 2. Paralipomenon 34., Anna Lucæ 2., ac Philippi Diaconi quatuor Filiae Virgines Actorum 21. Prophetiæ dono insignes existisse dicantur, nullibi tamen legiturulierem aliquam Sacerdotali munere functam esse: *Prophetia*, (inquit Angelicus noster Præceptor in 4. sentent. dist. 25. qu. 2. art. 1. ad 1.) *Prophetia non est Sacramentum, sed Dei donum. Unde ibi non exigitur significatio, sed solam res: & quia, secundum rem, in his, quæ sunt animæ, mulier non differt a viro, cum quandoque, quantum ad animam, inveniat melior multis viris, ideo donum Prophetiæ, & alia hujusmodi potest recipere, sed non ordinis Sacramentum.*

II. Et quidem merito: Cum enim, qui ad sacrorum ordinum dignitatem evehitur, verbum vitæ loqui debeat in Ecclesia, pacis Evangelium annunciate, & ratione susceptæ dignitatis in sibi subditos dominari, profecto, secundum Dei institutionem, a Sacerdotio mulieres sunt excludendæ, quæ, teste Apostolo 1. ad Corinth. 14., 1. ad Timoth. 2., atque ad Ephesios 5. ad subjectionem factæ ad spirituale imperium nequeunt destinari. Si Sacerdotium (scribebat Epiphan. in hæres. 79.) si Sacerdotium mulieribus mandatum foret..., nulli potius, quam Mariæ illud in novo Testamento commissi debuit, cui tantus honor est habitus, ut gremio, sinuque suo Deum, Deique Filium exciperet... Verum longe Deo aliter visum est.

III. Hinc Montanistæ, Collyridiani, & quidam Marcus de Gnosticorum, ac Valentinianorum grege scelestissimus homo, quo sæminum sexum ad Hierarchicas eveheret functiones, cum nullum ex vetere, novoque Testamento haurire posset exemplum, ad stultos ethnicorum ritus ineptissime confugiebat.

IV. Ne ergo in dementissimam horum sententiam descendatur, dicendum omnino, pias illas mulieres, quæ a primis Ecclesiæ sæculis sub Diaconissarum nomine Ecclesiæ ministerio mancipabantur, non idcirco Ecclesiæ mancipatas fuisse, ut altari servirent, quod proprium Diaconorum est, sed ut ceteras erga mulieres religiosa charitatis officia exercerent.

V. Diaconissæ enim, dum Sacramentum Baptismatis triplici, vel unica immersione conferebatur, adultas sæminas ad lavacrum vestibus exuebant, ut scribit Epiphan. hæresi 75., eisque, post susceptum Baptisma, talem navabant operam, ut Ecclesiæ ministrorum aspectum omnino evitarent: Cum caput, & frons mulieris baptizandæ sacro chrismo

te ungi solet, Diaconissæ, quemadmodum refert auctor *Constitutio-  
num lib. 3. cap. 15.*, ejusdem sacri chrismatis per totum corpus diffun-  
dendi munere fungebantur: Cum rudes, imperitæque sæminæ in ca-  
thecumenos referrentur, ex *Decr. Conc. Carthagenensis* *lv. can. 12.*, eas  
primis Fidei rudimentis, ac Christianæ vitæ legibus Diaconissæ imbue-  
bant: Cum ea laudabilis consuetudo in Ecclesia vigeret, ut non permix-  
te, sed separatim viri, atque mulieres divinis mysteriis interessent, por-  
tam, qua Templum sæminæ ingrediebantur, Diaconissæ custodiebant,  
introeuntes admittebant, atque, ad præcavendum confusionis pericu-  
lum, propriam cuique sedem ipsæ assignabant: *Saluto* (scribebat Igna-  
tius Martyr, vel quicumque sit Auctor epist. ad Antiochenos) *saluto  
sanctarum portarum custodes Diaconissas*: Cum tandem mulier quæcun-  
que, quavis urgente necessitate, Episcopum, vel Diaconum adire vel-  
let, illa non nisi a Diaconissa castimonix teste, simulque custode in il-  
lius conspectum producebatur: *Ad Diaconum* (sancitum fuerat *lib. 2.  
cap. 16.* Constitutionum, quæ vulgo apostolicæ nominantur) *ad Dia-  
conum, vel Episcopum nulla mulier sive Diaconissa accedat*: Quin  
immo ad ethnicorum præcavenda scandala, & obstruenda ora inique  
loquentium, aliquando Diaconissæ, vice Diaconorum, sive ut Episco-  
porum iussa deferrent, sive ut spiritualem, temporalemve mulieribus  
opem darent, in Domos Fidelium mittebantur, ut ex citato Auctore  
*constitutionum lib. 3. cap. 15.* edocemur.

VI. Cum itaque Diaconissarum munia, si propius inspiciantur,  
non ad Sacrificium, ad quod peragendum sacra ordinatio est instituta, sed  
ad merum charitatis officium pertinerent, erraret quidem maxime, qui  
pias ejusmodi mulieres sub Diaconissarum nomine Ecclesiæ ministerio  
mancipatas vero Diaconatus ordine insignitas fuisse autumaret.

### De osculo pedum Papæ.

I. **I**N confesso est apud omnes, illud obsequii genus, quo oscula figun-  
tur pedibus Romanorum Pontificum, liberum ab initio fuisse, nul-  
laque lege sancitum. At unanimes omnes prædicant usu id, ac consue-  
tudine præscriptum esse, quæ vim legis decursu temporis sit sortita. *In  
his enim rebus, de quibus nihil certi statuit Scriptura Divina, mos  
Populi Dei, vel instituta majorum pro lege tenenda sunt* scribit Au-  
gust. epist. 56. ad Casulanum num. 2. Hujusmodi vero usum in monu-  
mentis historiarum, quæ pertinent tum ad Orientalis, tum ad Occiden-  
talis Imperii Principes, videamus.

II. Primus sane, quantum opinor, qui sine ulla controversia hoc  
obsequii genere a Græcis Imperatoribus cultus sit, is est Joannes Papa I.  
a Theodorico Italiæ Rege Constantinopolim ad lustrum senioreme le-  
gatus. Huic enim, ut refert Anastasius Bibliothecarius, *occurrerunt a  
milliario duodecimo omnis Civitas cum Cereis, & Crucibus . . . quin &  
Justinus Augustus humiliavit se pronus in terram, & eum adoravit*.  
Iisdem ferme honoribus exceptus est Agapitus Papa a Justiniano senio-

seniore, dum, ut addit citatus Auctor, *Piissimus Augustus Justinianus gaudio repletus humiliavit se Sedi Apostolica, & adoravit Beatissimum Agapitum Papam*. Quod si Imperator ipse hæreticorum fraudibus circumventus honorem hunc non præstitit Vigilio Papæ, præstitit tamen Populus *psalleus ante eum usque ad Ecclesiam S. Sophiæ, & dicens: ecce advenit dominator Dominus*. Justiniani vero senioris veitigiis non imitatus Justinianus junior, sed honorificentius acceptum voluit Constantinum Papam, cum hic Constantinopolim appropinquaret. Septimo enim ab ea urbe lapide ejusdem Imperatoris filius cum Proceribus Aulæ Patriarcha, & Clero obviam ei prodiiit; Imperator autem, ut primo Pontificem Maximum inspexit, pronus in terram illius pedes illico osculatus est. Ita Anastasius.

III. Ceterum Orientalium Imperatorum in Pontifices veneratio nem major longe subsequuta est Occidentalis Imperii Principum. Si quidem compertum his omnibus fuit, non nisi maximum obsequii genus decere Pontificem regentem Populos, monentem Episcopos, edentem omnibus leges, & præcepta sempiternæ salutis. Anastasius de Luitprando Longobardorum Rege memoriæ prodidit, quod cum is Romam venisset barbarico eam furore populaturus Gregorii II. majestate perterritus repente cecidit ad pedes ejus. Idem quoque Anastasius penes Thomassinum de Eccl. discipl. parte 2. lib. 3. cap. 62. num. 1. & 2. narrat, quod Pipinus potentissimus Rex obviam factus Stephano II., qui Gallias adierat, *de equo descendit, ac cum magna humilitate terræ prostratus una cum sua Coniuge, Filiis, & optimatibus sanctissimum Pontificem suscepit*. Testatur Paulus Æmilius in vita Caroli Magni, quod *prius Adriani Pontificis pedes osculo contigit, quam se illi amplectendum daret*. Litteris commendavit Theganus, quod eundem Stephano IV., alias V. religiosum cultum præstitit Ludovicus Pius:

IV. De aliis Imperatoribus, & Regibus, qui subsequuti sunt, eadem, quæ de his, fama pietatis, & in Romanos Pontifices venerationis eximia. Omnes enim fere Reges, quoties eis data occasio est, ad pedes Pontificum procubuisse memorat Anastasius in historiis Pontificum, ac potissimum in Valentino, Sergio II., Leone IV., Benedicto III., aliisque. De Conrado Romanorum Rege accepimus a Baronio ad annum Christi 1095. & a Thomassino in loco citat. cap. 65. num. 4., quod Cremonam veniens Urbanum II. plenus obsequii coluit. Idem præstitit Callixto II. Willelmus Calabriæ, & Apuliæ Dux. Sugerius ad annum Christi 1130. meminit Innocentii II., ad declinanda mala, quæ sibi a Petro Leonis Pseudo pontifice intentabantur, in Gallias profecti, eique refert obviam progressum esse Regem ad Flaviniacum, sive ad Cœnobium S. Benedicti ad Ligerim, & demisso ad ejus pedes capite toties coronato, tanquam ad sepulcrum Apostolorum Principis procubuisse; Quo humilitatis obsequio Rex Angliæ eundem erga Pontificem perfunctus est.

V. Atque hinc facile intelligitur, cur, dum renueret Fridericus I. Imperator inaudito quodam superbæ fastu consuetum obsequii genus

Adria-

Adriano IV. Pontifici exhibere, Pontifex ipse, magni, infractique animi vir cum esset, teste Baronio ad annum Christi 1155., tam luculenter ostendit, illud sibi ab Imperatore præstandum, ut ad ejus pedum oscula statim cucurrerit Fridericus, ceteraque de more adimplenda omni festinatione voluerit adimplere. Quare Thomassinus in citata parte 2. de Eccl. discip. lib. 3. cap. 65. num. 5. circa medium: *mirari subit, inquit, quod Pontifex cultum religiosum ab origine liberum tanto vigore extorquendum ab invito Imperatore censuerit; sed illud quoque menti succurrere debet, quod sæpiusculum inculcatum a nobis est: quæ officia spontanea primum, & libera ab exordio sunt, longo usu, & consuetudine confirmari; inveteratas autem, & ita confirmatas consuetudines in leges valere demum. Etenim sive jura, sive officia appellites, tum civilia, tum ecclesiastica id genus complurima sunt.* Huc usque clarissimus Auctor, cujus sententia ex his, quæ postmodum subsequuta sunt, luculentissime confirmatur. Porro detectam in Friderico repugnantiam ad Imperii Principes derulit Adrianus, cumque inter eos, ut rei gravitas postulabat, gravi, serioque consilio examinata diu, ac librata fuisset, teste Baronio, ab omnibus constitutum est, eosdem a Friderico honores Pontifici exhibendos, quos præfci Imperatores eximii, Lotharius nempe, aliique Adriani prædecessoribus perfolvisset.

VI. Quod si postea prævaricatus Fridericus in Alexandrum III. Adriani successorem arma moverit, eumque, Victore opposito, in Gallias secedere coegerit, nihilo tamen minus Alexander ipse a Ludovico VIII. Franciæ, & ab Henrico II. Angliæ Regibus tanta acceptus est veneratione, ut nunquam magis. Quin immo, sedata postmodum eæ Sacerdotii, & Imperii dissensione, Fridericus idem Venetiis in vestibulo S. Marci, tanta humilitatis, ac obsequii significatione ejusdem Alexandri pedes osculatus est, ut eam, nobilissimam alioquin, Urbem ad splendidi majestatis fastigium evehere visus sit. Anilium tamen fabularum ab hæreticis confictarum in numero habemus, quod Alexander Friderici caput pede presserit in contemptum: Ut adversus Picininum de vera Christi Ecclesia tomo 1. cap. 15. §. 6. num. 29., scite, sapienterque demonstrat Eminentiissimus Gotti, vir profecto talis, ut ejus in scribendo doctrinam mirentur omnes, pietatem autem in agendo nemo desideret.

VII. In Pontifice ergo Apostolorum Principem cum tota Pontificatus, Regiique Sacerdotii majestate regnantem Fideles ita semper reveriti sunt, ut Græcus & ipse Imperator, Rainaldo teste, Ferrariæ occurrens Eugenio IV. ad genua omnino procubuisse, si id ei Pontifex permisisset. Hoc autem quod schismaticorum Imperatori denegavit Eugenius, permisit Friderico III. Romanorum Regi Nicolaus V., ut nimirum cum Imperatrice suos ad pedes procumberet, eos osculaturus. De Christierno Daniæ Rege memoriæ proditum est, quod pedes Sixti IV. Pontificis osculatus non potuit adduci, ut surgeret, donec Christi Vicarius loqueretur. Carolum VIII. Gallorum Regem fuisse novimus, qui coram Alexandro VI. bis genuflexit, eo utpote, qui imaginem præferebat in terris omnia regentis, & moderantis Dei.

VIII. Nec latere nos debent quæ de Francisco I. refert Rainaldus, quod nimirum Bononiæ Leonis X. pedes, manus, faciemque osculatus gallico sermone testatus sit, incredibili se gaudio perfundi, quod B. Petrum in suo successore intueretur, eique tam præstaret obedientiam, quam filius patri impendere, & præstare tenetur. Tandem eorum ex numero, qui Pontificem, ut decet, quam maxime venerati sunt, Rainaldus memorat fuisse Carolum V. Imperatorem vere summum, scientiaque rei militaris cum primis Romanæ Reipublicæ luminibus comparandum. Hic nanque cum Bononiam, ut a Clemenie VII. corona donaretur, adisset, genu flexit coram Pontifice, pedes, manusque, & genas illius osculo coluit, ac tam demisse se gessit, ut Pontifex ulterius eum progredi vetuerit.

IX. Fuit sane proprium Christianæ Reipublicæ Principum, ac quoruncunque Christianorum (quemadmodum animadvertit Anastasius in Leone IV.) ut quoties Pontificem inviserent, toties ad illius pedum oscula *pro antiquo more* advolarent. Jam vero Anastasius id scribit de more, qui vigeat anno 847. Igitur, si antiquus eo tempore is erat, liquido innotescit, quantum Novatores desipiant, dum a Romanis Pontificibus eum recenter institutum dicunt, cum temporales dominii jura latius explicarint: Liqueat etiam quam recto, sapientique consilio inter antiqua Pontificis decora percensuit S. Gregorius VII., quod ipsius *pedes Principes deosculentur*. Enim vero si a primis Ecclesiæ sæculis id honoris exhibitum est Episcopis, nulla licet inter alios Primatus prærogativa præcellerent, ut de Epiphanio refert Hieronymus epist. 61., de Basilio Amphiloehius, de Ambrosio Paulinus Nolanus, seu quisvis alius, qui illius gesta conscripsit, equidem multo magis exhiberi debuit Pontifici, qui omnium Episcoporum caput dictus est in epist. Synod. Concil. Chalcedonens., Episcoporum Magister, & Pater in orat. acclamat. VI. Synodi general. ; Terrestris Deus in actis, quæ præcesserunt Synodum, quam Gregorius III. Romæ hic habuit, ut periculum, quod a Leone Isaurico in omnes intendebatur, strenue, ac foris propulsaret; Qui denique is vere est, cui Christus cum dixerit *pascere oves meas, pascere agnos meos*, voluit, ut utar verbis S. Eucherii Episcopi Lugdunensis, sive Eusebii Galli homil. in pervigil. B. Petri, voluit, ut unus ovili pariter, ejusque Ducibus præsideret, unus traderet & optima gregi pascua, & per necessaria Pastoribus documenta.

X. Firmissimis ergo innixa est momentis doctrina, quam propugnamus, quod nimirum non Regni fastus, ut Novatores blaterant, sed summa Romani Pontificis potestas, dignitas, amplitudo ex Dei voluntate omnibus manifestanda Reges etiam, ac Principes ad illius pedum oscula perducit. Quemadmodum enim nostræ Religionis veritas vel ex eo maxime innotescit, quod tot Regna, ac Imperia idololatricis superstitionibus antea addicta, una Dei omnipotentis virtute, eas abdicarint, atque ad unius Hominis Crucifixi adorationem devenerint, in hoc nanque verum Deum, quem antea despectum habuerant, confessa sunt: Ita & Romanæ sedis Primatus ex eo etiam luculentius apparet, quod tot Reges,

ges, ac summi Principes uno Dei ductu, contra ingenitos dominandi stimulos, ad illius pedum oscula procumbant, quem ante Pontificatum, quandoque se ipsi duxerant inferiorem. Tanto enim, tamque repentino, & novo subjectionis obsequio, non hominem, quem antea viderant, in electo Pontifice, sed ipsum summum Deum in illius Vicario venerantur. Quocirca & ipse scripsit Gersonius tom. 1. de potestat. Eccles. considerat. 11., *ex consideratione potestatis stupenda, & miraculosa Pontificis Imperatores etiam & Reges procumbunt ad oscula pedum Papæ (& aliquibus interjectis). Hinc fit præterea, quod absque mendacio, vel adulatione Papa nequissimus potest appellari sanctissimus, potest adorari cultu dulci usque ad oscula pedum.* Et Innocentius III. de myst. Mist. lib. 2. cap. 37. Diacono præcipit, ut, *non manus, sed pedes summi Pontificis osculetur... ut eum illius ostendat esse Vicarium, cujus pedes osculabatur mulier illa, quæ fuerat in civitate peccatrix.*

XI. Quid quod istud obsequii genus non tantum ad declarandum Romani Pontificis Primatum, verum etiam ad commendandos Dominicæ Crucis triumphos potissimum sit institutum? Ad Christi enim vestigia Fideles advolant, dum ad Papæ genua, & ad ejus osculandos pedes accedunt. Interrogati porro, cur cultum hujusmodi Pontifici tam demisse impendant, id respondent, quod de Hebræorum Pontifice dixit Alexander Macedo relatus a Josepho antiquitatum Judaicarum lib. 11. cap. 8. *Non hunc se adorasse, se Deo, cujus Pontifex est, honorem exhibuisse.* Pontifices quoque, quod exigunt, obsequium sibi non quidem, sed Christo adjudicant, cujus Crucem in calceis, quibus figuntur oscula, ostendunt. Crux æque ipsis pro baculo est, Crucem in vertice Tiaræ, ac in utraque Pallii parte gestant, Crucem pendente collo præferunt; Uno verbo dicam, a capite ad pedes hoc ornati salutari signo summam sibi reverentiam conciliant. Hæretici ergo dum nos, qui Pontificem veneramus, irrident, eos se proferunt, quos Paulus ad Philipp. 3. v. 19. nominat *inimicos Crucis, quorum finis interitus.*

XII. Quare jure merito Othoni Frisingensi Episcopo, imperiali licet consuetudine, & consanguinitate floret, *Cronic. lib. 4. in Prolog.* ea animo insedit sententia, ut scriberet, summi, sempiternique Numinis providentia factum esse, ut e pulvere, & tenebris emissa Ecclesiæ, eum in splendorem proveheretur, quo de terrenis omnibus potestatibus, & imperiis toties triumpharet, quoties summi terrarum Principes, ac Reges Crucem Christi osculo pedum Pontificis venerantur.

XIII. In Pontifice namque Christi tanquam Vicario adimpleta videntur, quæ de Christi primario Ecclesiæ capite vaticinatus est Isaïas cap. 60. v. 14., dum scripsit *& venient ad te cuncti Filii eorum, qui humiliaverunt te, & adorabunt vestigia pedum tuorum.* Siquidem ad Christi gloriam cultum hujusmodi pertinere, nemo certe ignorat, nisi qui in veritatis audio hospes omnino, & peregrinus inveniat. Præsertim cum Pontifices, ubi aliter ipsa Dei gloria exigit, ad ultimam usque humilitatem se ipsi abjicere non dubitent. Peregrinorum enim pedes in Cœna Domini ad Christi imitationem lavant, eosque humillime etiam osculantur.

XIV. Ut

XIV. Ut ergo ritus osculandi pedes Romani Pontificis divinis litteris, rationi, historicisque monumentis apprime convenit: Ita singularis, atque inaudita paret hæreticorum vesania, dum hunc eundem morem sanctissimum maledictis, ac conviciis carpere non verentur.

### *De jure Gentium, & Naturæ.*

I. **Q**ui de jure Naturæ, & Gentium sermonem hæcenus instituire in tam diversas abierunt opiniones, ut verbis vix, aut ne vix quidem exprimi possit. Alii enim utrumque jus externa dumtaxat significatione distingui autumant, quod nimirum Naturæ jus ad singulos referatur homines, jus vero Gentium integris nationibus accomodetur; Atque inter hos principem sibi locum vindicat Jacobus Lehmannus in *Trutina, vulgo Balance Europe* cap. 2. §. 21., ubi plures, qui sibi in eadem opinione præfulserint, citat, Puffendorhium scilicet in elementis Jurisprudentiæ universalis defin. 13., & lib. 2. de jure Naturæ, & Gentium cap. 3., Christianum Thomassium in Institut. Jurispr. Divin. l. 1. cap. 2., Joannem Nicolaum Hertium in Jurisprudentia universalis sectione 1., Emmanuelem Weberum in Themat. selest. ad Puffendorhium, disputatione 1., Themate 13. Alii jus Gentium alias complecti leges, quam jus Naturæ, proindeque inter se differre quam maxime docuerunt, ut Hermannus Conringius Dissertatione de Legibus §. 24., Petrus Gassendus in Philosophia morali, Ultricus Obrechtus observationibus in Hugonis Grotii librum 1. de jure belli, & pacis cap. 1., Joannes Jacobus Mullerus in Institut. Jurisprud. Gent. lib. 1. cap. 1., Rachelius de jure Gentium §. 84., Franciscus Schmierius in Jurisprudentia Canonico-Civili lib. 1. tractatu 1. cap. 4., sectione 1., plurimique ex Theologis nostris, qui, utpote noti, omittuntur. Alii tandem alia pro libito excogitarunt.

II. Qua de re ut non tantum auctoritate scriptorum, quantum rationum pondere pugnare videamur, extremis omisiss, mediis adhæremus, ea præsertim de causa, quod diversa principia, terminos diversos, diversumque quodammodo juris utriusque objectum esse intelligimus. Naturæ enim jus proxime a Deo, Gentium tamen ex arbitrio hominum ortum habet; Illud vere omnes, & singulos homines omnino afficit, hoc eos solummodo moratos populos respicit, qui sponte sua ejusdem legibus se subjecerunt; Illud honesta dumtaxat, ut sequenda, atque inhonesta exhibet ut fugienda, hoc autem adiaphora adhuc complectitur, certisque conditionibus determinat ad obligandum.

III. Itaque etsi multa sint, propter quæ jus Gentium conveniat cum jure Naturæ, plurima tamen esse contendimus, propter quæ jus Gentium a Naturæ jure differre quam maxime detegatur.

F I N I S.

